

M024: Ava: Leben Jesu

0,1 Do Got hie in erde .
0,2 geborn wolt werden .
0,3 do hiz er iz uor sagen .
0,4 ysaia den wissagen .
0,5 un- ander ppheten .
0,6 daz er is willen hete .
0,7 daz in ein magit gebare .
0,8 daz iz deste gelovplicher ware .
0,9 swenne iz dar nach geschahe .
0,10 daz man in mennis gesahe .
0,11 wan diu magit ungeborne .
0,12 tete uil man werde uerlorne .
0,13 daz daz widertan wrde .
0,14 mit der magitlichen geburte .
0,15 Si was aller magede herist .
0,16 uon diu daz si allererist .
0,17 dar an volwonete .
0,18 daz si geheizen habete .
0,19 daz si gotes maget ware .
0,20 unde allez manchunde uerbare .
0,21 z allen werltwnnen .
0,22 si was reine uzen unde innen .
0,23 Gabriel der angls .
0,24 der erscein in de- hus;
0,25 Do hete got einen alten .
0,26 uil reinen gehalten .
0,27 ze helfe der magde .
0,28 ir noturfte ze gebinne .
0,29 ir gemahelen si in hiez .
0,30 dar umbe er nie ne liez .
0,31 er ne dienet ir mit triwen .
0,32 also mit rehte siner frovwen .
0,33 Do wart der engel gesant .
0,34 ze galyle in daz lant .
0,35 div burch hiez nazaret .
0,36 der gemahele hiez ioseph .
0,37 ze der magde reine .
0,38 do si in dem gademe saz eine .

0,39 si bette umbe daz heil der werlte .
0,40 do chom ir des si gerte .
0,41 der heilige sp-c .
0,42 sc-s .
0,43 der enphiench ir die wambe sus .
0,44 er bescatewet ir lichnamen .
0,45 do wart si swanger ane man .
0,46 Da ne was hirat .
0,47 noh manlich rat .
0,48 noh werdich gelust . noch nehein honchust .
0,49 diu magit wart uil wol geret .
0,50 ir chiuske gemeret .
0,51 ir magtuom gehalten .
0,52 mit gnaden manichualten .
0,53 do der da gherbergote .
0,54 der si gebildote .
0,55 also geistliche- si in enphie .
0,56 so wizzet daz diu geburte ergie .
0,57 Jedoch getruopte si daz .
0,58 daz si eine . da saz .
0,59 do sprach iz sc-e Gabriel .
0,60 “niht furhte du dir .
0,61 iz ist dir wol ergangen .
0,62 du hast ein chint enphangen .
0,63 danne wahset ein man .
0,64 der wirt geheizen got sun .
0,65 Jesus wirt er genent .
0,66 des elliu welt mendet .”
0,67 div magit gelovbte ime daz .
0,68 gotes sun samt ir was;
0,69 Do diu magit des uerstunt .
0,70 daz iz chom uone got .
0,71 un- der hailige atem .
0,72 entswebete ir den lichnamen .
0,73 uon den uoozen unze an den wirbel .
0,74 do gihite der himel zu der erde .
0,75 daz wart da ze stet scin .
0,76 do er sprach daz wort sin .
0,77 danne huop sich diu magit .
0,78 daz ist uns ovch e gesaget .
0,79 in di burch ze iuda .
0,80 in daz hus zacharya .
0,81 da uant si inne .
0,82 ein wip mit liehteme sinne .
0,83 der wambe was beuangen .
0,84 mit dem guoten Johanne .
0,85 do ir stimme si uernam .
0,86 iesa si wissagen began .

0,87 Si sprach "uon wehleher gewrhte chumet mir .
0,88 daz du chome zv mir .
0,89 muoter mines herren .
0,90 min chint wil diu eren .
0,91 daz mendet sich ine mir .
0,92 iz hat sich gecheret hin ze dir ."
0,93 do chust si diu frowe .
0,94 Sc-a MaRia .
0,95 si sprach "got hat siner diuwe gedaht ."
0,96 unde sanch . "Magnificat ."
0,97 si saget unde sanch .
0,98 got gnade unde danch .
0,99 uil michel mandunge was da .
0,100 da nach wonete si da .
0,101 eines manodes zit .
0,102 des freovten sich diu heiligen wip;
0,103 Do diu heilige- tovgen .
0,104 diu da ergan was uber unser frowen .
0,105 Josebe rehte chunt wart getan .
0,106 des erchom sich der hailige man .
0,107 er wolt tovgelichen .
0,108 der frowen geswichen .
0,109 der engel ime zu sprach .
0,110 in dem slafe da er lach .
0,111 er saget ime ze ware .
0,112 daz daz chint uon dem hailigen geiste enphangen waere .
0,113 Do iz got wolde .
0,114 unde iz werden solte .
0,115 Josep der guote .
0,116 die magit er dannin uuorte .
0,117 in die burch ze bethlehem .
0,118 da diu geburt solt ergen .
0,119 daz heten die wissagen .
0,120 gehundet uor manegem tage .
0,121 do was uon allen enden .
0,122 michel welt dar gesendet .
0,123 der iuden ein vil michel craft .
0,124 si scolten werden zinshaft .
0,125 ze den Romisken richen .
0,126 da ne mohte niemen dem anderen entwichen .
0,127 Do iosep begunde weruen .
0,128 umbe di herberge .
0,129 do ne liez in niemen in .
0,130 got gab im den gesin .
0,131 daz er den esel z einer chrippe treip .
0,132 diu here magit da beleip .
0,133 da uunden si ein rint .
0,134 da wart geborn daz frone chint .

0,135 mit den tovchen umbe.hebet .
0,136 in die chrippe gelegeet .
0,137 do entwech der esel unde daz rint .
0,138 si erten iesa daz frone chint .
0,139 Der da lach an dem lufte .
0,140 der hat in siner hant alle himeliske chrefte .
0,141 den bifie der magde wambe .
0,142 der ist noch umbeuangen .
0,143 in himele unde in erde .
0,144 daz er gebot daz muse werden .
0,145 do erscein ein Engel also her .
0,146 an dem uelde ze betlehem .
0,147 er saget den hirten .
0,148 die da wacheten uber ir chorter .
0,149 daz da geborn ware .
0,150 der werlt hailare .
0,151 Dar nach pi einer wile .
0,152 do sahen si scinen .
0,153 der engel ein uil michel craft .
0,154 si wurden da diensthaft .
0,155 mit michel eren .
0,156 unserem herren .
0,157 do sanch daz her himeliske .
0,158 “Gl\ a in excelsis .”
0,159 Die hirte niene erwunten .
0,160 des morgenes si in uunden .
0,161 waere unser herze guot .
0,162 so mahten wir sehen dieumuot .
0,163 an dem ersten tage .
0,164 alse ich uernomen habe .
0,165 do wart gebrieuet daz chint .
0,166 ze rome umbe ein phennich .
0,167 durch gotliche geslahte .
0,168 so ne gechert er nie uon meneslicheme rehte .
0,169 E er uns wrde gesendet .
0,170 er wart e gurchundet .
0,171 in Octauianes ziten .
0,172 uor heidiniscen luten .
0,173 iz was ein herlich dinch .
0,174 si sahen ze rome ein rinch .
0,175 gen umbe den sunnen .
0,176 uz einem hus floz ein olebrunne .
0,177 daz bezeichnenot daz .
0,178 daz er ein warez lieht was .
0,179 unde diu oberesten gnade .
0,180 an angenge unde an ende ze ware .
0,181 Do daz chint geborn wart .
0,182 ein sterne iesa gesehen wart .

0,183 der brahte ein unchundez lieht .
0,184 do ne zwieueloten niht .
0,185 in dem selben zite .
0,186 die heidenisken lute .
0,187 sich huoben dri chunege
0,188 her ze ierosolima .
0,189 ennen ostert uerre .
0,190 di wiste der selbe sterne .
0,191 uz ir lande .
0,192 da bi si daz erchanden .
0,193 daz der chunich hailant .
0,194 chomen was in unser lant .
0,195 Do ilten die herren .
0,196 ze ierusalen cheren .
0,197 si begunden uragen .
0,198 die wisen di da waren .
0,199 ube daz kint mare .
0,200 da geborn waere .
0,201 chunich der iudene .
0,202 liethuaz der tuogende .
0,203 do fur daz maere uber al .
0,204 daz niemen hal .
0,205 daz got geborn was .
0,206 die ubelen getrovpte daz .
0,207 do fraist iz Herodes .
0,208 er was sun des ewigen todes .
0,209 do hiez er im gewinnen .
0,210 die diu buoch chunden .
0,211 der uil ungehuire .
0,212 er besvvor si uil teuore .
0,213 daz si im sageten .
0,214 wie si gelesen habeten .
0,215 nach ir wanen .
0,216 wanne Crist chome .
0,217 Si sprachen alle gemaine .
0,218 er chumet z unserme haile .
0,219 iz chut div scriptura .
0,220 uon betlehem iuda .
0,221 da z dauides hus .
0,222 da uert daz chint uz .
0,223 der isrl . rihtet .
0,224 der werlt er aller philiget .
0,225 Goteweiz herre .
0,226 nu ne wizzen wir niht mere .
0,227 ob er noch geborn si .
0,228 des frage du di chunige dri .
0,229 die osteren geste .
0,230 di sagen uns uon criste;

0,231 Do hiez er ilen gengen .
0,232 die chunige gewinnen .
0,233 er bat si sagen maere .
0,234 obe crist geborn waere .
0,235 den ir sternen .
0,236 den sah er gerne .
0,237 wa er an uienge .
0,238 daz er uf gienge .
0,239 ube sin geuerte waere erlich .
0,240 anderem stirne gelich .
0,241 do der unguote .
0,242 iz allez ersindote .
0,243 do hiez er si dane gen .
0,244 suchen da ze bedehem .
0,245 do si hurlovp namen .
0,246 unde si ze wege chomen .
0,247 do erscein in ein liechter sterne .
0,248 den sahen si gerne .
0,249 do gieng er siner rihte .
0,250 z er aller gesihte .
0,251 uber die hailigen stat .
0,252 da daz kint ane lach .
0,253 da div muoter ane saz .
0,254 da gestunt daz liehtuaz .
0,255 do zugen si abe ir gewant .
0,256 si giengen in daz hus samt .
0,257 da uunden si inne .
0,258 die muoter mit dem chinde .
0,259 si gestunten ir bi .
0,260 si uielen nider alle dri .
0,261 vile wole si gebetten .
0,262 da nach si ime gebeten .
0,263 golt z allererist .
0,264 wande er ist chunich herist .
0,265 wirovch vil wol gezimit
0,266 swa man got opfper gibet .
0,267 daz gaben si got umbe daz .
0,268 daz er warer got was .
0,269 do gaben si im zeleste
0,270 aller rovch beste .
0,271 di roten mirren vmbe daz .
0,272 daz er waere mennisce was .
0,273 Vns hete der psalmista .
0,274 gesaget uon criste .
0,275 daz er die sundigen diet .
0,276 ne lieze under wegen niht .
0,277 dri chunige here .
0,278 die scolten crist eren .

0,279 si brahten gebe maere .
0,280 tiure unde swaere .
0,281 daz golt uon Arabya .
0,282 daz was ergangen iesa .
0,283 Do si do gebetten .
0,284 eine naht si sich enthabeten .
0,285 ein sconer engel in erscein .
0,286 er ceiget in einen anderen wech hine heim .
0,287 daz si niene chomen hine widere .
0,288 ze dem ungetriuwen chunege .
0,289 der mit sinem liste .
0,290 wolde slahen cristen .
0,291 der sich gezechinet hat .
0,292 an des tieueles getat .
0,293 der alle die wirret .
0,294 unde uil ulizechlichen irret .
0,295 di der ze gute gent .
0,296 unde sin dienest besten .
0,297 lieben mine herren .
0,298 des scult ir got flegen .
0,299 daz wir den uermiden .
0,300 so wir heim ilen .
0,301 so megen wir mit gesunde .
0,302 chom- heim ze lande .
0,303 hin ze paradyse .
0,304 uzer dirre freise .
0,305 do si du befunden .
0,306 der iuden luterunge .
0,307 unde si da getagenten .
0,308 als iz diu e habete .
0,309 uierzech tage . unde naht .
0,310 iosep ire mit triuwen phlach .
0,311 do fuort er si uone bethlehem .
0,312 in die burch ze ierusalem .
0,313 do ielten si ze dem templo cheren .
0,314 da uunden si einen wisen herren .
0,315 Symeon der alte .
0,316 deme hete got den lon behalten .
0,317 daz er in niht uon der werlt en name .
0,318 e er den gotes sun gesahe .
0,319 diu frowe gap daz chindelin .
0,320 dem herren an den arme sin .
0,321 do er den gotes sun enphie .
0,322 alter im uon den ovgen gie .
0,323 do gesach er heiterlichen .
0,324 des lobt er got den richen .
0,325 si hiez in tragen scone .
0,326 ze dem altere frone .

0,327 daz er ime tate .
0,328 alse iz diu e habte .
0,329 do brahten si mit sinne .
0,330 daz opfer zu dem chinde .
0,331 zua tuben uf den gotes tiske .
0,332 Symeon sanc "Nunc dimittis;"
0,333 Mit in wonete ein wip .
0,334 diu habete gehalten ir lip .
0,335 mit michelen eren .
0,336 uiere unde hazech iare .
0,337 daz was Anna pphetissa .
0,338 diu chunte in uns gewisse .
0,339 si was thohter phanuel .
0,340 unde was geborn de tibu assen .
0,341 Joseph unde symeon .
0,342 die heten michel wnderon .
0,343 Symeon iz neimen ne hal .
0,344 er sprach "dize ist ein urstende unde ein ual ."
0,345 er sprach ze der magde here .
0,346 daz durch ir sele .
0,347 ein swert scolte gen .
0,348 da mait ir die gotes martyr ane uersten .
0,349 do si z allez gehorte .
0,350 dannen si cherten .
0,351 in die burch ze nazaret .
0,352 alse iz hie gescriben stet .
0,353 Do was uile niwens uor im geborn .
0,354 der vil lange was erchorn .
0,355 daz er ein sterne ware .
0,356 der uor dem sunnen uof gienge .
0,357 er was ein haider liehtvaz .
0,358 in der wuoste lert er daz .
0,359 swer so mit triwen .
0,360 sine sunde wolte riwen .
0,361 dem warliche .
0,362 nahte daz gotes riche;
0,363 Do stunt iz unlanghe .
0,364 e heRode wart geuangen .
0,365 in den romischen landen .
0,366 zuei iar lag er in panden .
0,367 do er en dannen prast .
0,368 wi luzel der chinde genas
0,369 diu in zwein iaren .
0,370 da geborn waren .
0,371 er hiez si elleu erslahen .
0,372 daz musen diu armen wip chlagen .
0,373 Daz underuor Joseph der guote .
0,374 mit der engelischen huote .

0,375 si huben sich beidu eines nahtes ensamet .
0,376 unde fuorten daz chint in egiptlant .
0,377 wolten wir iz merchen .
0,378 iz mahte unsich in dem heiligen gelouben sterchen .
0,379 do daz chint in daz lant chom .
0,380 nehein apgot ganze da ne beleip .
0,381 da dinoten si im ze ware .
0,382 sibentehalp iare .
0,383 unze herodes uersciet .
0,384 der heilige Engel daz geriet .
0,385 daz si den gotes werden .
0,386 furten widere in die israhelischen erde;
0,387 Dannen uber driu iar .
0,388 do uuor diu mait daz ist war .
0,389 z einer tult hin z ierusalem .
0,390 si bat daz chint mit ir gen
0,391 do si gebette .
0,392 uil wol si getagete .
0,393 do iz allez was ergangen .
0,394 do huop si sich dannen .
0,395 do uergazen si lewes .
0,396 des obristen chuniges;
0,397 Do si chomen under wegen .
0,398 unde ir herren wolten phlegen .
0,399 do uermisten si des chindes .
0,400 uil harte erchomen si des .
0,401 do ilten si widere gen .
0,402 in die burch ze ierusalem;
0,403 Do giengen si in daz templu- .
0,404 da uunden si den gote sun .
0,405 Sin gebaerde div was gotlich .
0,406 sin vrage div was wislich .
0,407 Do si ir liebez chint ersach
0,408 vil erchomechlichen si do sprach .
0,409 “Sage liebez chint mir .
0,410 waz hast du begangen an mir .
0,411 Din vater vn- ich .
0,412 drie tag habe wir gesuhet dich .
0,413 Wie sule wir daz versten .
0,414 daz du mit vns niht woldest gen .”
0,415 Sin antwurte div was gotlich
0,416 “war vmbe suoches tu mich .
0,417 Ich sol billich phlegen .
0,418 swaz mir min vater hat gegeben .”
0,419 Do iach er offenbare .
0,420 an den himelischen vater ze ware .
0,421 Zwelf iar was er alt .
0,422 do offent sich sin gewalt .

0,423 Si baten in mit in gen .
0,424 si en liezzen in da niht besten .
0,425 Si furten in mit gvote .
0,426 zv der rehten haimute .
0,427 In di burch ze nazareht
0,428 ez en wart . e . noch seit .
0,429 Nie dehein man .
0,430 siner muoter so gehorsam .
0,431 Von danne vber ahtzehen iar .
0,432 daz ist alzoges war .
0,433 Do was sin alter gezalt .
0,434 zwelf tage und drizzech iar alt .
0,435 Do fur er zv dem iordane .
0,436 getovft ward er ane wane .
0,437 Von sande Johanne .
0,438 dem heiligen manne .
0,439 Als er in daz wazzer gie .
0,440 ein stimme sich her nider lie .
0,441 Ze des tofers gehorde .
0,442 von der oberisten hohe .
0,443 Div stimme sprach ze dem svne .
0,444 im waer wol glichet an im .
0,445 Er hiez uns daz vil rehte horn .
0,446 waz vns sin guet wolde leren .
0,447 Do het vns got der gvote .
0,448 gerefsset in der sinflute .
0,449 Daz er des riwe hete .
0,450 daz er den menschen ie gebildete .
0,451 Daz ward vns vergolden .
0,452 von sinem gewalte .
0,453 Wan er des riwe het enphangen
0,454 do er in daz wazzer was gegange- .
0,455 Wasschen vnser sunde .
0,456 des wart Johannes vrchunde .
0,457 Do sach er ob im sweben .
0,458 daz en sul wir niht vberheben .
0,459 Den heiligen geist als ein tovben .
0,460 wir suln iz Johanni gelovben .
0,461 Wand er daz herhorn was .
0,462 daz sagt vns zacharias .
0,463 Do wart er gelaittet .
0,464 iesa in arbeite .
0,465 Von dem heiligen geiste
0,466 daz geschach durch vns allermeiste .
0,467 In die woste z einem berge
0,468 da er bechort wolde w'den .
0,469 Daz tet sin guet vmbe daz .
0,470 daz er vns gelovbet deste baz .

0,471 Do vastet er alle .
0,472 viertzich tage volle .
0,473 Daz er en tranch noch az .
0,474 vil vaerich was sin d' sathanas .
0,475 Wand er gemerchet habte .
0,476 daz er sich von allen sund'e enthabte .
0,477 Der tivel also freissam .
0,478 in die woste er engegen im qam .
0,479 Er sprach "nu heiz disen stain
0,480 ob du wellest got sin .
0,481 Werden ze brute"
0,482 der tievel want ob er in des genote .
0,483 Daz er im ovch mer volgete .
0,484 an dem im wol behagete .
0,485 Do antworte im do got .
0,486 di heiligen schrift er im do bot .
0,487 "Ez en wirt ovch niht alein genote .
0,488 gefurt mit dem brote .
0,489 Der lip noch div sele
0,490 Sunder sie frevt div gotes lere .
0,491 Div von gotes mu-de get .
0,492 vil saelich ist der si verstet ."
0,493 Do dem tievel do missegie .
0,494 Anders er iz ane vie .
0,495 Er furt den gotes werden .
0,496 vf ein wintp'gen .
0,497 Er sprach . "val hin nider von mir .
0,498 niene wirret iz dir .
0,499 Di engel her gahent .
0,500 schone si dich enphahent .
0,501 Ja sprichet der psalmiste .
0,502 von dir ihu- xpriste .
0,503 Daz din fvzze noch din bein .
0,504 niht en serig der stain ."
0,505 Des antworte im der guot .
0,506 mit degenlichem muot .
0,507 "Dv solt dinen herren .
0,508 niht gar ze verre .
0,509 Mit cheinen dingen bechorn .
0,510 des wirdes tv liht v'lorn ."
0,511 Dar nach furt er in schone .
0,512 vf einen berch hohen .
0,513 Er zeigt im algeliche .
0,514 di irdisschen riche .
0,515 "Val nider vn- bete mich an .
0,516 ditz wirdet dir als vndertan ."
0,517 Des antwort im der gvote .
0,518 mit micheler demvote .

0,519 "Nu tv behalten dinen rat .
0,520 vn- val zerukke satanat .
0,521 Du solt an biten den rainen .
0,522 got herren altersainen ."
0,523 Do liez er in da .
0,524 di engel dienten im sa .
0,525 Da wart d' tivvel geschendet .
0,526 da mit si div rede v'endet .
0,527 Nv geb vns got die sinne .
0,528 daz wir fvr bringen .
0,529 Von vnserm h'ren christe .
0,530 wie er nach der tofve stifte .
0,531 Ein ander christenhait .
0,532 di wuhs sit . vn- ist nu bereit .
0,533 Zvz im chom alerste
0,534 andreas der herste .
0,535 Johannes stabat .
0,536 den gotes sun er sten sach .
0,537 Er sprach . "ecce agnus d'i ."
0,538 zv sinen ivngern zwein .
0,539 Daz er daz lamp waere .
0,540 daz der waerlde sunde naeme .
0,541 Beide gie-gen si im nach .
0,542 der gotes sun vmbe sach .
0,543 Er fraget was si suhten .
0,544 si sprachen sin wonu-ge ob er s geruhte .
0,545 Er hiez si nah im gen .
0,546 er liez si iz sehen vn- v'sten .
0,547 Daz was div zehent hora .
0,548 do chom der guot andrea .
0,549 An dem anderem tage .
0,550 als ich v'nomen hab .
0,551 Do chom der guot petrus .
0,552 den braht andreas sus .
0,553 Do er zvo . got gie .
0,554 wie wol er in enphie .
0,555 Er sprach . "du bist svn iohanna"
0,556 do offent sich iesa .
0,557 Daz er ein tofve waere .
0,558 vn- er svn der obristen genade .
0,559 Do gie vnser hailant .
0,560 ze galilee in daz lant .
0,561 Da vand er einer guot man .
0,562 geheizzen philippus san .
0,563 Der braht von betsaida .
0,564 einen waren israhelita .
0,565 Nv sprichet ein gramaticus .
0,566 iz waere bartholomeus .

0,567 Als er zv got gie .
0,568 vil wol er in enphie .
0,569 Er sprach daz er an valsch were
0,570 vn- an guotem gelouben saehe
0,571 Do gie er vf bi dem mere .
0,572 do merte sich sin here .
0,573 Do vand er zebedeum .
0,574 vn- sin zwene svn .
0,575 Jacobum vn- Johannen .
0,576 zwen guot manne .
0,577 Si volgeten ovch christe .
0,578 der ein wart ewangeliste .
0,579 Dar nach chom thomas .
0,580 der sit ein zwivlaere was .
0,581 Der braht den andere- iacubu- .
0,582 er was christes muemen sun .
0,583 Symon braht iudam .
0,584 selbe ladet er Matheu- ewang'listam .
0,585 Er machet mit chrefte .
0,586 grozze wirtschefte .
0,587 Da sah man ze ware .
0,588 vil manigen svndare
0,589 Daz niden di glissenaere .
0,590 vn- di scribaere .
0,591 Si sprachen daz iz christ waere .
0,592 ein frevnt der svndaere .
0,593 Der da chom ze leste .
0,594 der was niht der beste .
0,595 Der was der ermiste man .
0,596 von dem ich ie v'nam .
0,597 Daz was Judas scariotis .
0,598 ir svlt den sin gewis .
0,599 Er sach div gotis gvete .
0,600 er moht sin gemuete .
0,601 Zvo im niht cheren .
0,602 er heizet sinen herren .
0,603 In im huob sich michel nit .
0,604 sinen schepph' verriet er sit .
0,605 Do waren di zwelf herren .
0,606 di mit got waren
0,607 Jungern di sinen .
0,608 daz heilige ingesinde .
0,609 Dar zvo erwelten waren .
0,610 zwen vn- sibentzich herren .
0,611 Die man an manigen enden .
0,612 solde fur senden .
0,613 Ze chastellen vnd ze burgen .
0,614 swa ir durf worde .

0,615 Swa got bredigen wolde .
0,616 daz si daz chunden solden .
0,617 Vber ein iar nach siner tofē .
0,618 da ward er ze einer brovtlofte .
0,619 Geladen vn- die iuenger . sin .
0,620 di heten lutzelen win .
0,621 Do sprach diu guete .
0,622 des hailandes muoter .
0,623 “Vil lieber svne min .
0,624 hie ist v’zert der win .
0,625 Ze dirre wirtschefte .
0,626 nu erzaige diu gotlich chrefte .”
0,627 Do sprach der wandels vrie .
0,628 zvo sande Marien .
0,629 “Wip hore her zv mir .
0,630 was gehort daz zvo mir oder zv dir .
0,631 Her nach chumt diu zit .
0,632 wil du merchen guot wip .
0,633 Daz ich vil wol erzaige dir
0,634 waz ich han von dir .”
0,635 Do hiez si diu dinestman .
0,636 ir svn wesen vndertan .
0,637 Da stvnden sehs chruge stainein .
0,638 diu fvlten si algemain .
0,639 Si guzzen dar in wazzer .
0,640 gotes gewalt vest er .
0,641 Wan ez ward der beste win .
0,642 der dehainer mohte sin .
0,643 An dem ahtoden tage
0,644 als wir iz v’nome- haben .
0,645 Do gieng er auf einen berch hohen .
0,646 da erzeigte er sin schone .
0,647 Gotlich mit sinen drin iuengeren
0,648 diu er von den and’n wold besundere- .
0,649 Daz ain was petrus .
0,650 daz ander Johannes vn- Jacobus .
0,651 Si sahen da vil michel wunne .
0,652 sin antlutze wart liechter danne diu sunne .
0,653 Sin gewaete wizzer dann der sne .
0,654 des en sahen si niht e .
0,655 Vnderdev mit in was .
0,656 Moyses vn- helyas .
0,657 Si horten hie nidene .
0,658 ein stimme von himele .
0,659 Vil willechlichen zvo dem svn .
0,660 er hiez daz wir v’naemen in .
0,661 Peter bat den gotes svn da .
0,662 daz er warhte drin tab’nacl’a .

0,663 Dar nam der gotes sun .
0,664 zvo im sine ivnger .
0,665 Er sprach wir suln varen ze ierusalem .
0,666 da iz allez sol ergen .
0,667 Daz vns die wissagen .
0,668 chunten in ir tagen .
0,669 Da git man der magde sun .
0,670 den haiden unde den iuden .
0,671 uil sere si in uiltent .
0,672 si marterent in uil grimme .
0,673 nach maniger not .
0,674 so lidet er den tot .
0,675 dar nach an dem triten tage .
0,676 so erstet er uon dem grabe\&1
0,677 Diu rede was in ze tief .
0,678 si ne uerstunten ir niht .
0,679 iedoch dahten si dar zv .
0,680 du nahten si iericho .
0,681 bi dem wege saz ein plinter man
0,682 uil luote er ruofen began .
0,683 er sprach “fili dauid .
0,684 nu wis du mir genadich;”
0,685 Die da uur fovren .
0,686 die hiezen in horen .
0,687 sumiliche in stnovten .
0,688 uil harte si im drouten .
0,689 si baten in swigen .
0,690 si sprachen sin ruofen mahte niemen erlieden;
0,691 Do si in swegten ie mere .
0,692 so ruoft er lutere .
0,693 “fili dauid .
0,694 erbarme dich uber min lip .”
0,695 do er zv im chome .
0,696 uil wol er in uernam .
0,697 er hiez daz er im sagete .
0,698 wes er gebeten habete .
0,699 do sprah der plint bi dem wege .
0,700 “herre daz ich gesehe .”
0,701 unser herre lobte daz .
0,702 daz er des scazes niene bat .
0,703 er sprach “din gelovbe hat ernert dich .
0,704 nu gench her naher unde gesich .
0,705 hinnen uuor mere .
0,706 an dem liebe unde an der sele\&1”
0,707 Daz ich iu sage daz ist war .
0,708 ein burch hiez samaria .
0,709 dar chom er muoder gegangen .
0,710 er saz uber einen brunnen .

0,711 die boten gingen in die burch .
0,712 si wrfen des in was durft .
0,713 do chom ein wip gegangen .
0,714 si wolt scephen den brunnen .
0,715 si ne moht es niht gedenchen .
0,716 er bat si ime des brunnen gescenchen .
0,717 nach uil manegen Worten .
0,718 als ich sagen horte .
0,719 du saget er ir daz .
0,720 daz er was chunftige messias .
0,721 Do chomen sine iungere .
0,722 si begunden sich wnderen .
0,723 waz er so genote .
0,724 mit dem wibe geredet hete .
0,725 Niht langer si da ne saz .
0,726 si lie da liegen daz brunneuaz .
0,727 uil drate si danne lief .
0,728 hei wie lute si rief .
0,729 nu ne sumet iuch nih . langer
0,730 iu ist chomen ein liht .
0,731 uor der burch ist ein man .
0,732 der saget mir allez daz ich han getan .
0,733 durch sine guote tet er daz .
0,734 daz er daz tet sunder laz
0,735 er lerte mih uil scone .
0,736 uon sexte unze none .
0,737 nu wizzet daz iz war ist .
0,738 ez ist der heilige christ .
0,739 si sagete rehte daz er was .
0,740 der chunftige messias;
0,741 Do si daz wip uernamen .
0,742 si ilten dare gahen .
0,743 si enphiengen in mit eren .
0,744 si begunden in phelegen .
0,745 daz er durch sine guote .
0,746 ein luzel da getaete .
0,747 da was der heilige criste .
0,748 rehte zeweir tage friste .
0,749 uil wol er si lerte .
0,750 die burch er al becheret;
0,751 Do wolte unser herre .
0,752 ze der heidenscefte cheren .
0,753 do chom er ze zwein burgen .
0,754 der heiz einen tyri et sydon .
0,755 dannen uz lief ein wip .
0,756 uil lute si ime nach rief .
0,757 “fili dauid .
0,758 nu wis mir genadich .

0,759 min tohter ist beheftet .
0,760 mit micheler uncrefte .”
0,761 unser herre iz uberhorte .
0,762 di zewelfpoten in noten .
0,763 daz er umbe sahe .
0,764 unde des wibes pete uername .
0,765 er sprach “ich ne bin niht gesendet .
0,766 ze den haidenischen enden .
0,767 sunder ich chom umbe daz .
0,768 durch daz israheliske leut daz da uerlorn was .”
0,769 innen diu daz wip uuor in lief .
0,770 an dem wege si uuor in uiel .
0,771 si sprach “fili dauid .
0,772 erbarme dich uber mih uil armez wip .”
0,773 “Daz n ist niuht guot .
0,774 daz man daz prot .
0,775 neim den chinden .
0,776 unde werfe iz den hunden .”
0,777 des antwrte im daz wip sa .
0,778 “herre du hast uil war .
0,779 iedoch chomen ze helfe .
0,780 die broseme den welfen .
0,781 die uon des herren tiske choment .
0,782 die hungerigen hunde si nement .”
0,783 ze sinen uuozen si sich pot .
0,784 si chlagete im weinunde ir not .
0,785 do sprah der heilige crist .
0,786 owi wip michel din gelovbe ist .
0,787 also du wellest so gescehe dir .
0,788 getrostet uar du uone mir .
0,789 in allem dinem sere .
0,790 daz ne werre dir niemer mere;(.)”
0,791 Dei buoch sagent uns sus .
0,792 ein burch hiez zesarius .
0,793 dar chom er gegangen .
0,794 mit anderen sinen iungeren .
0,795 er bat si daz si im sageten .
0,796 alse si uernomen habeten .
0,797 waz die lute redeten .
0,798 umbe den sun des mennischen .
0,799 “Nv sprechent sumiliche sus .
0,800 du sist Johannes .
0,801 so sprechent sumiliche daz .
0,802 du sist Elyas .
0,803 so sprechent sumliche daz .
0,804 du sist Jeremias .
0,805 oder etlicher der wissagen .
0,806 da uuor wellent si dich haben .”

0,807 Des antwrte in alsus .
0,808 unser herre iewus .
0,809 “nu sult ir mir sagen .
0,810 uuor waz ir mich welt haben .”
0,811 des antwrte ime petrus .
0,812 der was ein prelatus .
0,813 “vil wol weiz ich wer du bist .
0,814 du bist . der heilige crist .
0,815 des lebentigen gotes sun .
0,816 der uns chom uon himele;”
0,817 Do sprach der heilige chreste .
0,818 uil salich Simeon du bist .
0,819 iz ne hat dir niht eroffenot .
0,820 neweder fleisk noch pluot .
0,821 sunder min uater der da ist .
0,822 qui habitat in celis;
0,823 noch di helleporten .
0,824 di ne gestent niht uor dinen worten .
0,825 ih beuilehe dir an dem sinne .
0,826 ze losene unde ze bindene
0,827 “in der erde unde in dem himele .
0,828 des ne si dir niht widere .
0,829 ich gibe dir die sluzele des himeles .
0,830 uil gewaltich sist du is alles .”
0,831 er sprach “ich wil uof dich stiften .
0,832 die christenheit rihten .
0,833 du bist der allerbeste .
0,834 geleit an die gruntfeste .
0,835 ein stein wirs tu genenet .
0,836 uil maniger din noch mendet .”
0,837 Do ladet in ein siech man .
0,838 er hiez in bitten .
0,839 daz er durch sine guote .
0,840 in uon der michelsuhte nerte .
0,841 Do er in daz hus chom .
0,842 unde er ezzen began .
0,843 in dem selben muose .
0,844 chom dar ze huse .
0,845 ein suntigez wip .
0,846 also iz an der rede chut .
0,847 si brahte ir salbe .
0,848 si gie christes halbe .
0,849 si gie hinder im zuo .
0,850 nider chinite si du .
0,851 si weinote uil suoze .
0,852 an die gotes uuoze .
0,853 mit trahenen si si badete .
0,854 mit der salben salbete

0,855 mit ir uahse si sie wiskte .
0,856 uil lieblichen si si chuste .
0,857 ich weiz in s der bedahte .
0,858 der in dar brahte .
0,859 er dahte in sinem muote .
0,860 ware dirre guote .
0,861 ein rehter propheta .
0,862 alse ich gedaht hete .
0,863 er rechante daz wip .
0,864 ir was uil suntich der lip .
0,865 er sprach daz ware .
0,866 ein gemeineu sundarien .
0,867 Do sprach christ ze dem manne .
0,868 uone sinen gedanchen .
0,869 “hor here Symeon
0,870 du solt ein urteile tuon .
0,871 nu waren zewene arme man .
0,872 die solten scaz gelten .
0,873 der eine besundert .
0,874 der solt uif hundert .
0,875 der ander dar engegene .
0,876 sibinstunt zehene .
0,877 do uerliez er in die schulde .
0,878 daz si ime waren holde .
0,879 durch uil michel minne .
0,880 die selben phenninge .
0,881 nu sage du mir simeon .
0,882 zeige dinen wistuom .
0,883 weder den herren .
0,884 solte minnen mere .”
0,885 er sprach “so ich uerstein mach .
0,886 dem er mere uergap .”
0,887 do sprach got ze der stunde .
0,888 “du hast sin reht uunden .
0,889 ich chom hiute her ze dir .
0,890 noch sa wazer gabe du mir .
0,891 des du hast genuoge .
0,892 daz ich min fuzze dwuoche
0,893 auer duoch si si mit den brunnen .
0,894 der ir uon deme herzen was entsprungen .
0,895 si wiskte si mit ir hare .
0,896 daz zihet ze der grozen minne ze ware .
0,897 Do ich hiute her n in din hus gie .
0,898 unde ich zu dem muose gephe .
0,899 daz ist dir selbem wol chunt .
0,900 du ne chuste mir niht minen munt .
0,901 aue chuste si mine uuoze .
0,902 daz zuhet ze der merre suoze .

0,903 Do ich hiuote hie gesaz .
0,904 du ne gabe du mir daz oleuaz .
0,905 daz ich ze note .
0,906 min houbet gesalbote .
0,907 aue daz wip di du sihest .
0,908 unde si sundich haizest .
0,909 diu brahte ir salben .
0,910 reine gehalden .
0,911 si salbete mine fuoze .
0,912 der stanch wart suoze .
0,913 daz eruullet wart daz hus .
0,914 uil guot stanch gie dar uz;”
0,915 Do bliht er uof an daz wip .
0,916 do sprach der ewige lip .
0,917 “nu wis tu wip enbunten .
0,918 uon allen dinen sunten .
0,919 durch dine minne .
0,920 so laz ich dich uaren hinnen .
0,921 ane dine sunde .
0,922 nu uar in gotes munde;”
0,923 Swa er hine cherte .
0,924 die tunben er lerte .
0,925 die armen er troste .
0,926 die behaften er loste .
0,927 er half der wazersuhte .
0,928 die chrumben er rihte .
0,929 er entsloz die touben oren .
0,930 er lie si wol horen .
0,931 die miselsuhtigen er nerte .
0,932 daz si in ne tertte .
0,933 er hiez die stummen sprechen .
0,934 er temperote die frechen .
0,935 er hiez den uergihtigen gan .
0,936 sin bette in sin hus tragen .
0,937 Do chom der unser hailant .
0,938 in ein unchundiz lant .
0,939 diu lute namen diu chindelin .
0,940 si brahten si an unseren trahtin .
0,941 du betragt es die alten .
0,942 si hiezen die uorderen gehalten .
0,943 uil harte si s bedroz .
0,944 in wart uil manich widerstoz .
0,945 do enphingen si crist mit minnen .
0,946 er hiez si dare zuo bringen .
0,947 uil holtlichen er si ane sach .
0,948 vil minnechlichen er in zuo sprach .
0,949 er sprach daz si waeren .
0,950 die erben der himelischen gnaden .

0,951 Do chom er iesa .
0,952 in ein chastel daz hiez Bethania
0,953 da enphiengen in inne .
0,954 zvi wip mit guotem sinne .
0,955 diu eine hiez Martha .
0,956 diu ander Maria .
0,957 sich hete maria geledet .
0,958 unde gefriet .
0,959 si saz suze .
0,960 zu den gotes fuozen .
0,961 uil gerne si horte .
0,962 swaz er guotes lerte .
0,963 Martha gie umbe .
0,964 den gesten dienende .
0,965 geteilet was der ir sin .
0,966 iedoch gestunt si bi in .
0,967 si sprach “min uil liebe .
0,968 mir ne hilfet niemen dienen .
0,969 ich han michel sorgen .
0,970 uon dem abent unz an den morgen .
0,971 nu gebiut du marien .
0,972 daz si mir helfe dienen;”
0,973 Do sprach der heilige christ .
0,974 “uil noturft daz dienst ist .
0,975 iedoch hat din swester .
0,976 erwelt daz allerbeste .”
0,977 martha danae giench .
0,978 ze deme dienst si uiench .
0,979 unze unser herre da saz .
0,980 maria da mit im was .
0,981 Die heligen zwelfpoten .
0,982 eines tages giengen si mit gote .
0,983 da sahen si ein blinden man .
0,984 ir einer fragen began .
0,985 uon welcher gewrchte .
0,986 der selbe blint wrte .
0,987 du sprach der heilige christ .
0,988 ich sage iu rehte waz iz ist .
0,989 iz n ist uon sinen sunden .
0,990 noch uon sinem chunne .
0,991 diu gotes werch hie in erde .
0,992 suln uon ime gelovbet werden .
0,993 Do er dar zuo chom .
0,994 sine speichelen er nam .
0,995 dar zuo nam er erde .
0,996 er temperote si werde .
0,997 er streich iz dem blinden .
0,998 uber diu ovgen an der tingen .

0,999 er hiez in ze syloe gan .
0,1000 wasken siniu ougen .
0,1001 er sprah "du solt gesehen .
0,1002 unde solt iz iemer gote iehen;"
0,1003 Daz was uil sciene getan .
0,1004 gesehene wart der selbe man .
0,1005 duo iz diu lute gesahen .
0,1006 uil harte si erchomen .
0,1007 si fragten in genote .
0,1008 uon wiu er sin gesune hete .
0,1009 Do sprach der gesehene .
0,1010 "ich bin sin got iehende
0,1011 hie uuor fuor ein man .
0,1012 ein hor er temperen began .
0,1013 fure mineu ougen er iz streich
0,1014 diu blintheit mir entweich .
0,1015 er hiez mich iz abe wasken ze aineme se .
0,1016 ich ne sach niht e
0,1017 er gab mir miniu ougen .
0,1018 ich wil an in gelouben;"
0,1019 Do iz die iuden gehorten .
0,1020 si fragten in gnote .
0,1021 uone weme er des iahe .
0,1022 daz er so wol gesahe .
0,1023 du sprach der petelare .
0,1024 daz er is got iahe .
0,1025 "Jesus nazarenus .
0,1026 der gebot iz alsus .
0,1027 daz ich daz lieht sahe .
0,1028 unde ich is got iahe .
0,1029 dem bin ich iemer iehende
0,1030 daz ich wart gesehene ."
0,1031 Do chomen si den friunden zu .
0,1032 uil harte notigoten si sie duo .
0,1033 ob der betelare .
0,1034 uone geburte blint ware .
0,1035 si sprachen ze ware .
0,1036 daz er blint geborn waere .
0,1037 si ne wessen aue niht .
0,1038 uon wem er habet daz liht .
0,1039 Do giengen si ime auer zuo .
0,1040 si notegoten in duo .
0,1041 daz er in rehte sagete .
0,1042 uone weme er gesune habete .
0,1043 du sprach der arm man .
0,1044 uil luote er brahten began .
0,1045 "Ihc- nazarenus .
0,1046 der gebot iz alsus .

0,1047 ich was ein betelare .
0,1048 welt ir iz nu horen .
0,1049 lop dir heiliger christ .
0,1050 du der uns uon gote chomen bist .
0,1051 daz ich han mineu ougen .
0,1052 ich wil an dich gelouben .”
0,1053 Uil harte si in stouten .
0,1054 den friunten si drouten .
0,1055 si taten im daz ze leide .
0,1056 si namen im die gemeinde .
0,1057 si wrfen in vz der straze .
0,1058 si ne wolten in dar ine niht lazen .
0,1059 Do er uon dem wege chom .
0,1060 wie lute er brahten began
0,1061 wie harte er si geneizite .
0,1062 uil lute er si reizte .
0,1063 er zuo . iz allez z eren .
0,1064 christ sime herren .
0,1065 Do chom der heilige christ .
0,1066 der der armen trost ist .
0,1067 er fragte den armen man .
0,1068 war umbe er waere uz getan .
0,1069 er sprach “ich was hie beuor ein plint man .
0,1070 daz puzte mir ein gut man .
0,1071 Jesus nazareus .
0,1072 der gebot iz alsus .
0,1073 durh daz ahten si min .
0,1074 iedoch pin ich iemer der scalch sin .”
0,1075 Do sprach der heilige christ .
0,1076 “waist du noch wer er ist .
0,1077 ob du in gesahest .
0,1078 du sin iunger werest .”
0,1079 hin naher trat der arm man .
0,1080 uor liebe er weinen began .
0,1081 “wie gerne ich in gesehe .
0,1082 daz ich ime ueriahe .”
0,1083 “nu giench her nach mir .
0,1084 uil wol gezeige ich in dir .
0,1085 nu wizest daz iz war ist .
0,1086 mit dir choset der iz ist .”
0,1087 der plint da ze wege gie .
0,1088 fuor got er nider uel .
0,1089 er bette in mit herzen .
0,1090 er lobte in mit sinen werchen .
0,1091 uil guotlichen er in ane sach .
0,1092 er uolget im iermere nach .
0,1093 Über uierzec tage .
0,1094 uor sinen marterlichen tage .

0,1095 do chom er in bethania- .
0,1096 zwei wip erbat in da .
0,1097 daz ir bruder gnas .
0,1098 der dri tage begraben was .
0,1099 du iz die iuden gehorten .
0,1100 uil harte si erchomen .
0,1101 si ilten sich besenden .
0,1102 in allen den enden .
0,1102a die lukken ppheten .
0,1103 daz si in uerrieten .
0,1104 Do sprach der biskolf cayphas .
0,1105 des daz ambahte was .
0,1106 er saget in daz i alwar .
0,1107 iz ware bezzer getan
0,1108 daz eine sturbe .
0,1109 denne daz ellev diu werlt uerlorn wrde .
0,1110 zuz in chom pylatus .
0,1111 der underwant sich des rates .
0,1112 den sprach iudas .
0,1113 der sin chamerare was .
0,1114 er sprach ob si in wolten miten .
0,1115 daz er in in uerriete .
0,1116 du puten si ime ze minnen .
0,1117 drizech phenninge .
0,1118 du uerriet er sinen herren .
0,1119 des enkalt er uil sere .
0,1120 du was unser herre gegen .
0,1121 in eine burch diu hiez effrem .
0,1122 da entwalt er sibene tage .
0,1123 du zegie er sich auer sa .
0,1124 do chom er widere in bethania- .
0,1125 do emphiengen in maria unde martha .
0,1126 Do er ze dem inpize gesaz
0,1127 MaRia braht ein oleuaz .
0,1128 mit dem heren balsamu-
0,1129 salbet si den goten sun .
0,1130 die uuoze unde daz houbet .
0,1131 si het in gegarwet an den tot
0,1132 Daz pemurmelote iudas .
0,1133 der sin lagere was .
0,1134 er sprach “pezzer ware .
0,1135 daz man iz den armen gabe .”
0,1136 do sprach der heilige christ .
0,1137 “Maria wi guot din werch ist .
0,1138 daz du ane mir hast getan .
0,1139 des solt du iemer lop han .
0,1140 in allen den enden .
0,1141 swa man mine martyr iemer erchenet .”

0,1142 Da getwalt er die naht .
0,1143 unze an den anderen tach .
0,1144 du sante unser herre .
0,1145 sine iungere zwene .
0,1146 daz si ime eine eselinne brachten .
0,1147 si legeten dar uof ir gewante .
0,1148 “ob iemen da widere si .
0,1149 so sprechet ir da bi .
0,1150 ir bedurfte der herre .
0,1151 daz saget ir in z ware .”
0,1152 Do saz er uf die eselinne .
0,1153 mit ir liuf daz iungedi .
0,1154 du reit er ze ierusalem .
0,1155 sine iungeren hiez er mit im gen .
0,1156 diu menege was grozlich .
0,1157 der antuanch was uile wunnechlich .
0,1158 die da nach fuoren .
0,1159 daz lop si huoben .
0,1160 di da uuore fuoren .
0,1161 daz selbe lop si huoben .
0,1162 si sprachen algeliche .
0,1163 “gesegenot sist u chint dauides .”
0,1164 die iz da uor wessen .
0,1165 die brachen ab dem bovme die heste .
0,1166 an den wech si sie legeten .
0,1167 dem esele si strouten .
0,1168 di diu zewei ne heten .
0,1169 die wurfen ir gewate .
0,1170 si enphiengen in mit eren .
0,1171 den cheiser aller herren .
0,1172 si sprachen algeliche .
0,1173 “lop si dir christ der riche .”
0,1174 Do gie der gote sun .
0,1175 ze ierusalem in daz templu- .
0,1176 do heten si z ir leide .
0,1177 dar in gefuoret ueile .
0,1178 beidu rinder unde scaf .
0,1179 uil gar zewarf er in daz .
0,1180 er sluch si uz .
0,1181 die tuben hiez er tragen uz .
0,1182 er sprach daz iz ware .
0,1183 ein hol der scachere .
0,1184 du hiez er iz reinen .
0,1185 er chot er wolt iz haben eine .
0,1186 den tach was er dar inne .
0,1187 du enthiel er einen blinden;
0,1188 Des anderen tages uil fruo .
0,1189 du brahten si ime ein wip zuo .

0,1190 die heten si uunden .
0,1191 an totlichen sunden .
0,1192 uil fro si du waren .
0,1193 da si mit ir fuoren .
0,1194 si wanten daz si mahten .
0,1195 den wistu- uberbrahten .
0,1196 ob er si nerte .
0,1197 daz im diu e daz werthe .
0,1198 unde hiez er si steinon .
0,1199 so ne ware niuht der gote sun .
0,1200 Do giengen si in daz templum .
0,1201 da uunden si den gote sun .
0,1202 ze des wibes gesichte .
0,1203 befulehen si im daz gerihte .
0,1204 si baten in daz er sagete .
0,1205 waz diu e habete .
0,1206 Do sprach er durch sine guote .
0,1207 swer die e habet behuotet .
0,1208 der solte si steinen .
0,1209 anders neheiner;(.)
0,1210 Do si daz uernamen .
0,1211 unwirdlichen si sahen .
0,1212 fliehen si begunden .
0,1213 ze den turn si uz drungen .
0,1214 da ne bestunt inne nehain lip .
0,1215 wane christ unde daz wip .
0,1216 do screip der gotes werde .
0,1217 mit den uingeren an der erde .
0,1218 uil lang er nider nihte .
0,1219 dar nach er uof blihte .
0,1220 du sprach er ze der gemeinen .
0,1221 “wa sint die dich wolten steinen;”
0,1222 Do sprach daz suntige wip .
0,1223 “hie n ist herre nehein lip .”
0,1224 du sprach daz ewige licht .
0,1225 “ich uerteile . din ouch niht .
0,1226 nu denche an die sele .
0,1227 unde ne sunde niht mere .
0,1228 ze ware sagen ich iz dir .
0,1229 dine sunde sint uergeben dir .”
0,1230 Als ich uernomen habe .
0,1231 uor dem tuoltlichen tage .
0,1232 du begurte sich der gote sun .
0,1233 du dwog er sinen iungeren .
0,1234 die uuze unde die hende .
0,1235 do wolt er iz allez enden .
0,1236 in siner heiliger minne .
0,1237 er lerte si du mit tiefeme sinne .

0,1238 Do chnit er uil suoze .
0,1239 uuore siner iungeren fuoze .
0,1240 du sprach sancte peter .
0,1241 “du ne gedwest mir niemer .”
0,1242 Do sprach got der riche .
0,1243 “so ne gewinnest du niemer tail in minem riche .”
0,1244 der antwurte ime uberlut .
0,1245 peter der sin trut .
0,1246 mine hende und min houbet .
0,1247 daz si dir herre e erloubet .
0,1248 du dwog er in allen .
0,1249 di fvzze nach einander .
0,1250 do iz allez was getan .
0,1251 sin gewate er an sich nam .
0,1252 do saz er ze muose .
0,1253 begunde mit in chosen .
0,1254 “under iu ist ein man .
0,1255 der mich hat uerraten .”
0,1256 die herren alle erchomen .
0,1257 si dahten wer er waere .
0,1258 Do wincten si einem chinde .
0,1259 deme guoten Johanne- .
0,1260 er lienete uf sinen brusten .
0,1261 sin minne was feste .
0,1262 daz er in erfuore .
0,1263 welher iz ware .
0,1264 do sprach der heilige christ .
0,1265 “under iu zweluen er ist .
0,1266 dem ich peute daz prot .
0,1267 der hat mir gegarwet den tot .”
0,1268 du iudas der diep .
0,1269 uon den anderen sciet .
0,1270 do ne twalt got niht .
0,1271 du geberhtelot er daz obrist lieht .
0,1272 du lerte si christ dar inne .
0,1273 uon siner heiligen minne;
0,1274 Dar nach wihte er daz prot .
0,1275 den einleuen er iz pot .
0,1276 er sprach “dize ist warez min flesk .
0,1277 dar zuo gecreftige iuch der heilige geist .
0,1278 daz ir diseu tougen .
0,1279 uil rehte geloubet .
0,1280 unde daz ir iz chundet .
0,1281 allen minen chinden .
0,1282 so wit so diu werlt ist .
0,1283 daz iz uuore iuch gegeben ist .”
0,1284 Do nam der unser heilant .
0,1285 den kelich an die hant .

0,1286 er sprach dize scult ir trinchen .
0,1287 unte sult is in miner gehugede gedenchen .
0,1288 daz iz min pluot ist .
0,1289 daz uuore die sunde der werlte gegeben ist .
0,1290 Do sprach der unser threhtin .
0,1291 zuo den iungeren sin .
0,1292 “iz ist ein wile daz ir mich sehet .
0,1293 unde daz ir min chume uerjehet .
0,1294 dar nach ne sehet ir min niht .
0,1295 so wirt becheret iuwer lieht .
0,1296 so sehet ir mich denne .
0,1297 uil churzlich ist iz denne .
0,1298 so uar ich offenliche .
0,1299 in mines uater rihe .
0,1300 so ne fraget mich niemen denne .
0,1301 war ich uaren welle .”
0,1302 Philippus uon bethsayda .
0,1303 der antwurte ime sa .
0,1304 daz er uile gerne sahe .
0,1305 wer der uater ware .
0,1306 er sprach trurlichen .
0,1307 “du fragest chintlichen .
0,1308 ich unde der uater min .
0,1309 uil ungesceiden sul wir sin .
0,1310 ich pin in ime . unde er in mir .
0,1311 uil wol geloube du iz mir;
0,1312 Ir birt mine uriunte .
0,1313 ob ir tut dei ich gebeute .
0,1314 der scalch ne mach wizen niht .
0,1315 waz deme herren si liep .
0,1316 durch daz nenne ich iuch uriunt min .
0,1317 wande ich iu chunt sol sin;”
0,1318 Nu z in choset auer got .
0,1319 “iz n ist nehein merre gebot .
0,1320 denne daz ir ouch minnet .
0,1321 also ich iuch han geminnet .
0,1322 doch n ist nehein merre minne .
0,1323 uone wibe noch uone manne .
0,1324 danne man durch sines uriuntes not .
0,1325 den lip gebe in den tot .
0,1326 daz han ich durch iuch getan .
0,1327 daz sult ir uor iuweren ougen han;”
0,1328 Do sprach unser herre .
0,1329 der scalch n ist niht mere .
0,1330 denne sin herre ist .
0,1331 uon deme er gesendet ist .
0,1332 daz ich hinet han getan .
0,1333 daz sult ir immermer began

0,1334 mit gehugede miner minne .
0,1335 so wahsent iu di hailigen sinne .
0,1336 so erslagen wirt der hirte .
0,1337 so zesprengt sich daz corter .
0,1338 mineu uil lieben chindelin .
0,1339 ich ne sol niht langer mit iu sin .
0,1340 ein niuwez gebot daz gib ich iu .
0,1341 daz diu minne si under iu .
0,1342 daz man erchenne da bi .
0,1343 daz ir min iungere welt sin .
0,1344 Do sazen die herren .
0,1345 uil trurich si waren .
0,1346 sancte peter gehiez .
0,1347 des er niuht war ne liez .
0,1348 er wolt an der erde .
0,1349 mit im leben oder sterben .
0,1350 “mich ne lezzet is nehein not .
0,1351 ich pin garrewer in den tot;”
0,1352 Got saget im also iz was .
0,1353 er sprach “hinet ritet dich satanas .
0,1354 alsam weize .
0,1355 daz solt tu wol wizen .
0,1356 nu la din uermezzen dich sin .
0,1357 drie stunte uerlougene du min .
0,1358 e der han hinat craige .
0,1359 daz sag ich dir ze ware;”
0,1360 Vf stunt unser herre iesus .
0,1361 er sprach zuz in eamus .
0,1362 du was iz uile spate .
0,1363 do gieng er an den berch oliueti .
0,1364 mit drin sinen iungeren .
0,1365 die nam er besundere .
0,1366 do gieng er alterseine .
0,1367 so man mach gewerfen mit einem staine .
0,1368 Sin houbet er neigte .
0,1369 sin breode sich erzeugte .
0,1370 mit michelem sere .
0,1371 dem oberisten herren .
0,1372 do ran dem gotes werden .
0,1373 der sweiz an die erde .
0,1374 der was pluotware .
0,1375 er-pleichet algarwe .
0,1376 “herre uater min got .
0,1377 nu sol ich liden den tot .
0,1378 maht iz iemer sus sin .
0,1379 daz genaren diu chint min .
0,1380 uil willeg ist der geist .
0,1381 unchreftich ist daz fleisk .

0,1382 unde swi iz umbe min not si .
0,1383 also du wellest so muze iz sin .”
0,1384 Hine widere gie der heilant .
0,1385 die boten er slauende uant .
0,1386 er sprach “peter trut min .
0,1387 du ne wil niht wachende sin .
0,1388 eine luzel wile .
0,1389 wie harte si ilent
0,1390 die mich gebent schiere .
0,1391 in die hende der sundare .”
0,1392 uon dem selben worte .
0,1393 erchomen si harte
0,1394 dannen huben si sich sciene
0,1395 do fragt er gotes sun .
0,1396 wie manic swert sie hieten .
0,1397 sie sprachen daz si zewi heten .
0,1398 des genuoete den guoten;
0,1399 [...] [...]
0,1400 Dannen huoben si sich sament .
0,1401 mit in gie der heilant .
0,1402 da was michel truren .
0,1403 si chomen de torrente cedron .
0,1404 da was ein garte .
0,1405 dar ilten si harte .
0,1406 mit stangen unt mit fakelen .
0,1407 da uingen si den gote sun .
0,1408 mit in lief iudas .
0,1409 der der wirsiste was .
0,1410 maister er in nante .
0,1411 daz man in da bi bechante .
0,1412 er chuste sinen herren .
0,1413 des encalt er uil sere .
0,1414 du sprach unser herre iesus .
0,1415 “friunt wie chumest du alsus;”
0,1416 Do fragte der gote sun .
0,1417 die iuden wen si suhten .
0,1418 si sprachen “iesum nazarenum .”
0,1419 er sprach “en ego sum .”
0,1420 uon dem selben warte .
0,1421 erchomen si so harte .
0,1422 daz si zerukke uielen .
0,1423 des erholten si sich sciene .
0,1424 do uiengen si im die hende .
0,1425 mit uestem gebende .
0,1426 under diu ougen si spiren .
0,1427 owi wie lute si scieren .
0,1428 si taten im ubele stozze .
0,1429 slege uil groze .

0,1430 do wolt er durch unsich horen .
0,1431 manegen itewiz bosen .
0,1432 si wanten iz war in wol ergen .
0,1433 si furten in ze ierusalem .
0,1434 Iz was ferre nahtes .
0,1435 si huten ir rehtes .
0,1436 si heten uiur gemachet .
0,1437 da was daz dinch gescafet .
0,1438 si heten iz uerscrannet .
0,1439 mit rigelen uersperret .
0,1440 si uuorten in in den urithof .
0,1441 da suhten si den biscof;
0,1442 Do fuorten si den guoten .
0,1443 gebundenen zu der gluote .
0,1444 da stuonten genuoge .
0,1445 die habeten iz ze huohe .
0,1446 daz si den gebunden sahen gan .
0,1447 der so grozeu zeichen habe getan.;(.)
0,1448 Ime was heiz unde kalt .
0,1449 siniu wizze waren manichualt .
0,1450 si fragten unseren herren .
0,1451 uon siner iungeren lere .
0,1452 si sprachen daz si daz ze nide wolten haben .
0,1453 daz sie azen ungedwagen .
0,1454 unde daz er sich uermaze .
0,1455 in dem sale da er saze .
0,1456 ob si iz zestorten .
0,1457 er wolt iz auer zimberon .
0,1458 daz sprach der uil wise .
0,1459 uon sinem libe .
0,1460 ob er uon in ersturbe .
0,1461 daz er auer lebentich wurde .
0,1462 Da nah uil unlange .
0,1463 chom sine trut peter gegangen .
0,1464 iohannes in in liez .
0,1465 daz in niemen danne ne stiez .
0,1466 do wart is ein wip geware .
0,1467 uil luote rief si dare .
0,1468 daz er ir einer ware .
0,1469 den si mit im sahe .
0,1470 des lougenote er do .
0,1471 daz wip ruft im aber zvo
0,1472 si sprach “ei disen galileiscen man .
0,1473 den sach man mit im gan .”
0,1474 er ne lougen es nie so harte .
0,1475 er was in dem garten .
0,1476 da man sinen maister fie .
0,1477 ich sach wa er mit im gie .

0,1478 Iz wart ime sit ein wize .
0,1479 do lougenot er mit flize .
0,1480 im ne sach nie so leide .
0,1481 do lougenote er mit eiden .
0,1482 daz was diu drite stunde .
0,1483 sin herre sah umbe .
0,1484 uil guotlichen er sach .
0,1485 niuweht er im zuo sprach .
0,1486 der hane iesa crate .
0,1487 peter sich uerdahte .
0,1488 waz er habet getan .
0,1489 do ilt er weinende dane gan .
0,1490 mit piterme sere .
0,1491 so chlaget er iz iermere .
0,1492 Swaz uon dem ersten zite .
0,1493 uone manne ode uon wibe .
0,1494 guoter lute uure gie .
0,1495 uil luzel unsich daz uerfie
0,1496 unze got sinen sun sante .
0,1497 ze den ellenden landen .
0,1498 die ubelen iz uerholn was .
0,1499 mit der gedulte er umbegurtet was .
0,1500 swaz so ie sunden .
0,1501 uon den ersten stunden .
0,1502 uon iemen was getan .
0,1503 daz muose allez uber in gan .
0,1504 Sie choltten in die naht .
0,1505 unze an den tach .
0,1506 do heizen si in pinten .
0,1507 si ilten in senden .
0,1508 dem biscolf unde den grauen .
0,1509 die da geweltich waren .
0,1510 do wolte unser herre .
0,1511 dennoch liden mere .
0,1512 si hiezen den wisen .
0,1513 uillen mit den risen .
0,1514 mit turninen besemen .
0,1515 slugen sie den gote sun .
0,1516 Ingressus pylatus .
0,1517 den gote sun fragt er sus .
0,1518 “sag mir uon dinen tugenden .
0,1519 bist u chunic der iuden .
0,1520 und ob du der gote sun sist .
0,1521 so sich daz duo mich iz niene uerswigest .”
0,1522 vnser herre swigte auer do .
0,1523 pilatus sprach im auer zuo .
0,1524 “war umbe swiges tu nu .
0,1525 ich mag tir scaden oder frumen

0,1526 dines todes .
0,1527 uil gewaltich pin ich des;”
0,1528 Do sprach unser herre .
0,1529 “dines gewaltes n ist nich mere .
0,1530 war der dir geben ist .
0,1531 durch der mennicken genist .
0,1532 durch daz chom ich ze ware .
0,1533 in den gewalt der sundare .”
0,1534 Dannen gie der graue .
0,1535 er ne wolt in niemer fragen .
0,1536 er sprach ze den husgenozzen .
0,1537 ob si in wolten lazen .
0,1538 er sprach an der stunde .
0,1539 daz er neheine scache ane im funde .
0,1540 an der er sahe .
0,1541 daz er des todes wert ware .
0,1542 “Ich han zwene sachman .
0,1543 der eine heizet barraban .
0,1544 der sult ir einen nemen .
0,1545 unde sult in der hochzite geben .”
0,1546 si sprachen alle “barraban .”
0,1547 der solt daz leben han .
0,1548 den uorderoten si ze dem libe .
0,1549 Jesum ze dem tode .
0,1550 An den stunden .
0,1551 roffen si begunden .
0,1552 si sprachen swer in lizze .
0,1553 der ne solt sin niht geniezen .
0,1554 si sprachen algemeine .
0,1555 er taete wider dem cheiser .
0,1556 si begunden lute scrien .
0,1557 si sprachen “tolle . tolle . crucifige eum .”
0,1558 Als er daz gehorte .
0,1559 daz si im drouten .
0,1560 do sprach pylatus .
0,1561 wand er ein gelihsenare was .
0,1562 er hiez in dar gan .
0,1563 er sprach er wolte uertragen .
0,1564 suas so si im taten .
0,1565 daz er dar ane sulde ne heti .
0,1566 Do waten si den guoten .
0,1567 in einen phellel roten .
0,1568 in sine hant eine roren .
0,1569 si taten im also einem toren .
0,1570 uf sin houbet die crone .
0,1571 die trovg er uil scone .
0,1572 uil wasse was si durnin .
0,1573 durch unsich laid iz min trahtin .

0,1574 vil harte si sich fovten .
0,1575 uur in si nider chniten .
0,1576 si gruozten in uil ubele .
0,1577 si sprachen "heil wis tu chunich der iuden;"
0,1578 Des n ist nehein lougen .
0,1579 si uerbunden im sineu ougen .
0,1580 si zugen in an die straze .
0,1581 da riche unde arme sazen .
0,1582 mit michelem huhe .
0,1583 uil harte si in slugen .
0,1584 si hiezen in wissagen .
0,1585 wer in hete geslagen .
0,1586 Die unsaligen lute .
0,1587 die warhten ein cruce .
0,1588 da si den guoten .
0,1589 vil crimme an ertoten .
0,1590 daz holz lach ze ware .
0,1591 in einem wiare .
0,1592 do si iz gewarhten .
0,1593 do legeten si iz uf den gote sun .
0,1594 Do hete er uber sich genomen .
0,1595 danne uns die sunde waren comen .
0,1596 uon dem erstem wibe .
0,1597 in dem paradyse .
0,1598 an dem holze huop sich der tot .
0,1599 an dem holze geuiel er got lop .
0,1600 do truog er iz iesa .
0,1601 an einen berch hiczet caluaria .
0,1602 mit im truog iz Symeon .
0,1603 er habet es luzelen lon;
0,1604 Daz cruce si gestahten .
0,1605 sine hende si im gerahten .
0,1606 da wurden uier nagele .
0,1607 durch cristen geslagene .
0,1608 durch sine hende .
0,1609 daz laid er durch unser sunde
0,1610 durch die fuze sine .
0,1611 daz wolt er durch unsich liden .
0,1612 itewize genuoge .
0,1613 mit michelem huohe .
0,1614 uil harte froueten si sich .
0,1615 si sprachen "nu stich .
0,1616 abe dem cruce .
0,1617 so geloube wir dir ."
0,1618 Do sprach er daz in durste .
0,1619 daz uernamen die fursten .
0,1620 neheines leides si ne bedroz .
0,1621 ich wane man zesamene goz .

0,1622 ezzich und gallen .
0,1623 daz zuo rieten si alle .
0,1624 daz man iz im scancte .
0,1625 unde in da mit trancte .
0,1626 Iz war in lait oder liep .
0,1627 er ne wolte sin niht .
0,1628 do heten si in gehangen .
0,1629 zwischen zwein schachmannen .
0,1630 der eine hin ze ime sprach .
0,1631 siner sunden er iach .
0,1632 “nu gehuge min herre miner .
0,1633 so du chumest in din riche .”
0,1634 er sprach ze ware sage ich iz dir .
0,1635 du bist hiute in paradyso mitsamt mir;
0,1636 Do sprach der ander schachman .
0,1637 “div red was vbel getan .
0,1638 Mohte er iemer frum wesn .
0,1639 so waer er saelbe genesen .”
0,1640 Des antworte im sari .
0,1641 der guot schachaere .
0,1642 Swaz so ich lide .
0,1643 daz ist umb min svnde .
0,1644 Daz er lidet den tot .
0,1645 des entwinget in dehein not .
0,1646 Wan sin einvaltigiv guete .
0,1647 durch des menschen note .
0,1648 Daz pluot uon abele .
0,1649 daz ruofte in di hohe .
0,1650 rache an sineme brovder .
0,1651 iz ne gestilte niemer .
0,1652 unze uns der niu adam .
0,1653 sines uater hulde gewan .
0,1654 daz er daz pluot an die erde liez .
0,1655 als er Abrahame geheiz .
0,1656 daz plut rovfte iemermere .
0,1657 “nu wis genadich herre”
0,1658 Ander daz cruce was gegangen .
0,1659 sin muot- unde sante Johannes .
0,1660 do sprach der gotes sun .
0,1661 ze sante maRien .
0,1662 “sich wip dize ist din suon wip .”
0,1663 daz maint er an sich selben .
0,1664 daz er daz chorter ware .
0,1665 daz er uon ir name .
0,1666 diu gotheit was der angel .
0,1667 den uerslant der alt slange .
0,1668 ime wart da gare gelonot .
0,1669 dar waorgete der ewige tot .

0,1670 Hin ze dem iungeren er sich cherte .
0,1671 den er geminnet hete .
0,1672 “sich dize ist min muoter .”
0,1673 do beualch er die guoten .
0,1674 sante Joanne .
0,1675 si beidu einandere .
0,1676 Do hub er ain stimme .
0,1677 do lerte er uns die uiande minnen .
0,1678 er sprach “nu uergip in herre uater got .
0,1679 si ne wizzen wa si tont .”
0,1680 z einer sexte daz ergie .
0,1681 daz man in an den galgen hie .
0,1682 da uaht er in agone .
0,1683 daz chanf unze an die none .
0,1684 do wart gesceiden der strit .
0,1685 do gesigte uns der liep .
0,1686 er sprach “iz ist al uerendot .”
0,1687 do gieng iz an den tot .
0,1688 do geschiet sin heiligi sele .
0,1689 uon dem liplichen sere .
0,1690 durch unsich leid er die not .
0,1691 nu sehet wi ir im sin lonon .
0,1692 Swi MaRia MaGDaLENa .
0,1693 wie gestonte du ie da .
0,1694 da dir dinen herren govten .
0,1695 sahe hangen unde bluoten .
0,1696 unde du sahe an sinem libe .
0,1697 die gestochen wnden .
0,1698 wi mohtest du uertragen .
0,1699 die laitlichen chlage .
0,1700 siner trut muter .
0,1701 sce- MaRIEN der guoten .
0,1702 wie manigen zaher si gaben .
0,1703 ze dem selben male .
0,1704 diniu chusken ovgen .
0,1705 min uil lieben frowwen .
0,1706 do du sus sahe handelon .
0,1707 din unsuldigen sun .
0,1708 do man in marterote also sere .
0,1709 daz fleisk daz er uon dir genomen hete .
0,1710 Swi iosep der guote .
0,1711 do du minen herren ab dem cruce huobe .
0,1712 hete ich do gelebet .
0,1713 ich hete dir uaste zuo gechlebet .
0,1714 ze der piulde here .
0,1715 mines uil lieben herren .
0,1716 Swi nychodemus .
0,1717 wane moht ich dir

0,1718 etewwaz liebes er bieten .
0,1719 ze lone unde ze mieten .
0,1720 daz du in h abe huobe .
0,1721 unde in so scone begrovbe .
0,1722 Do got daz gewan .
0,1723 dar umbe er her in werlt chom .
0,1724 do liez er sinen lichnamen .
0,1725 zu der erde begraben .
0,1726 die ze der erde warden waren .
0,1727 daz in die emphiengen .
0,1728 daz was also geordenot .
0,1729 diu erde was geheiligot .
0,1730 Do er do zewene tage .
0,1731 gerovwet in dem grabe .
0,1732 in der friste .
0,1733 do zestorte er die helleueste .
0,1734 er uuor mit lewenchreften .
0,1735 die grintel muosen bresten .
0,1736 die gaiste ungehiure .
0,1737 di sprachen in dem uuore .
0,1738 wer der waere .
0,1739 der so gewaltichlichen chome .
0,1740 “er bringet uns ein michel licht .
0,1741 er ne wonet hie mit uns niht .
0,1742 neheine sunde habete er getan .
0,1743 er ne mach hie niht bestan .”
0,1744 An der stunde
0,1745 do gesigt er an dem hellehunde .
0,1746 sine chiwen er im brach .
0,1747 uil michel leit ime da gesach
0,1748 ich weiz er in pant .
0,1749 mit siner zeswen hant .
0,1750 er warf in an den hellegruont .
0,1751 er leit ime einen bouch in sinen munt .
0,1752 daz dem selben gule .
0,1753 allezane offen stunde daz mule .
0,1754 swer durch sine sunde .
0,1755 chome in sine slunden .
0,1756 daz der freisliche hunt .
0,1757 niht geluchen mege den munt .
0,1758 daz er in durch pihte unde durch puze;
0,1759 sines vndanches muezze lazzen .
0,1760 Do ne wolte er niuht uermiden .
0,1761 do chert er sich ze den sinen .
0,1762 die in der uinster waren .
0,1763 ein niuz licht si sahen .
0,1764 uil harte frovten si sich des .
0,1765 si sprachen “aduenisti desiderabilis .”

0,1766 Er sprach "min erbarmede mich ne liez .
0,1767 ich taete also ich iu geheiz .
0,1768 ich han durch iuwere not .
0,1769 erliten einen crimmechlichen tot .
0,1770 die mich habent geminnet .
0,1771 di wil ich fuoren hinnen .
0,1772 swer hiute hie bestat .
0,1773 des ne wirt niemer nehein rat .
0,1774 in desme hellesere .
0,1775 des ne gewise ich nimer mere;"
0,1776 Do fuort er si alle .
0,1777 mit herege uon der helle .
0,1778 er gab in allen geliche .
0,1779 wider sin riche .
0,1780 die si uon sculden heten uerlorn .
0,1781 do was gestillet sin zorn;
0,1782 Wol du heiliger wistuom .
0,1783 wislichez hertuom .
0,1784 obristiu magencraft .
0,1785 himeliskiu herschaft .
0,1786 ditze werch was gehalten .
0,1787 diner guote unde dinem gewalte .
0,1788 daz du in so guoten .
0,1789 erchuktest uon den toten;
0,1790 Do erstunt er uon den toten .
0,1791 mit libe unt mit sele .
0,1792 die des grabes huoten .
0,1793 die wrten also die toten .
0,1794 duo diu sele unde diu gotheit .
0,1795 widere genam die mennesheit .
0,1796 in die burch si liefen .
0,1797 si sageten unde riefen .
0,1798 ein forhtlich maere .
0,1799 daz er estanden waere .
0,1800 duo buten si in ze miten .
0,1801 silber unde golt daz rote .
0,1802 daz si in uerholne .
0,1803 sageten uerstoln .
0,1804 daz si des uaste iahen .
0,1805 daz in die iungeren da nemen .
0,1806 An der iuden sampztage .
0,1807 die frowen sazen pi deme grabe
0,1808 MaRIa magdalena .
0,1809 diu bette unze none .
0,1810 duo daz osterzit fuore wart .
0,1811 duo gie si an den marchet .
0,1812 si choft en bigmenten .
0,1813 so wolte ir herren salben .

0,1814 mit heizen traehen tet si daz .
0,1815 uil chume gelebete si die naht;
0,1816 Nv wil ich iu zellen .
0,1817 die iz uernemen wellen .
0,1818 wer die waren .
0,1819 di mit ir giengen .
0,1820 daz selbe was MARIA
0,1821 magdalena .
0,1822 die dir unser herre hailant .
0,1823 erlost mit siner gewalt .
0,1824 uon den ubelen gaisten .
0,1825 ir chlage was allermaiste .
0,1826 daz ander was MARIA .
0,1827 des heilandes niftela .
0,1828 diu ysacches tohter;
0,1829 Jacobes swester .
0,1830 daz drite was salme .
0,1831 si chomen ensamet ze dem re;
0,1832 Do stunten ahtoten .
0,1833 frovwen die guten .
0,1834 wi si den michelen stein .
0,1835 mahten gewelzen inain .
0,1836 daz si dannen chomen .
0,1837 daz si die iuden nine saehen .
0,1838 Do funden si da sizen .
0,1839 ein engel wizen .
0,1840 mit liehtem gewate .
0,1841 si sahen ouch ein roten .
0,1842 ir antluze scein scone .
0,1843 uil harte si des erchomen;
0,1844 Der engel sprach ze den wiben .
0,1845 “ir ne durfet niht zwiuelen .
0,1846 den ir welt salben .
0,1847 der ist hie erstanden .
0,1848 ir ne sult iz niht uerdagen .
0,1849 ir sult iz peter sagen .
0,1850 und anderen sin iungeren .
0,1851 daz si nine zwiuelen .
0,1852 daz iz also ergangen ist .
0,1853 so iz iu uil diche uor saget ist;”
0,1854 Die frovwen giengen dannen .
0,1855 die boten si besanten .
0,1856 si sageten in diu maere .
0,1857 daz er estanden ware .
0,1858 “uns chunten die engele .
0,1859 die gotes urstende .”
0,1860 die boten iz gerne horten .
0,1861 uil chume si iz geloupten .

0,1862 Maria magdalena .
0,1863 diu ne bette niht mere .
0,1864 daz ne lie si durch freise .
0,1865 noch durch die nahtegese .
0,1866 si chomen ein luzel uor tage .
0,1867 hine widere zu dem grabe .
0,1868 mit michelen ruochen .
0,1869 begunden si in suochen .
0,1870 uil sere chlageten si daz .
0,1871 daz si ne wessen wa er was;
0,1872 Do stunt si alterseine .
0,1873 si begunde harte weinen .
0,1874 daz houbet nechte si in daz grap .
0,1875 da ir herre inne lach .
0,1876 die trahene dar in runnen .
0,1877 uon ir herze sprach der brunne .
0,1878 si uorhte daz ir herre .
0,1879 da uerstoln ware .
0,1880 Do der morgen uof gie .
0,1881 unser herre in den garten gie .
0,1882 in den armer gereizt er ir den lip .
0,1883 er sprach “waz wainest du wip .”
0,1884 MaRia zeruke sach .
0,1885 uil guotlichen er ir zu sprach .
0,1886 si want ze ware .
0,1887 iz ware ein gartenare .
0,1888 si in nante ir herren .
0,1889 si wainote ie mere unde mere .
0,1890 unser herre sprach ir auer zuo .
0,1891 “wip waz wainest du nu .”
0,1892 si sprach “daz ich waine also sere .
0,1893 daz tun ich minen herren .
0,1894 der mir ist hie genomen .
0,1895 ich ne weiz war er ist chomen .
0,1896 maht u mir sin frume sin .
0,1897 ich gibe dir al die habe min .”
0,1898 Er sprach “noli flere .
0,1899 nu ne weine nie mere .”
0,1900 MaRia er si nante .
0,1901 uil wol si in pechante .
0,1902 si gestunt im bi .
0,1903 si sprach o bone rabi .
0,1904 “nu ne ruore mich” sprah er “niht .
0,1905 ich ne chom noch zu minem uater niht .
0,1906 du solt den iungere- sagen .
0,1907 daz si niht en chlagen .
0,1908 petere unt den anderen .
0,1909 daz ich pin erstanden .

0,1910 daz si chomen in galile .
0,1911 dar wil ich fore in gen .”
0,1912 MaRia iesa dane gi .
0,1913 dar nach er ir widergie .
0,1914 zwei wip im widergiengen .
0,1915 die uuze si im uiengen .
0,1916 si chusten also suoze .
0,1917 die wunden an den uuzen .
0,1918 MaRia nien erwant .
0,1919 e si di iunger uant .
0,1920 si sagete in z ware .
0,1921 daz er erstanden ware .
0,1922 “iz sahen miniu ougen .
0,1923 ir sult iz wol gelovben .
0,1924 Surrexit dn-s .
0,1925 daz ist unser herre iesus .”
0,1926 Zwene sine iungeren .
0,1927 huben sich uon den anderen .
0,1928 der eine was ein alt man .
0,1929 uil harte er gahen began .
0,1930 daz eine was ain iungelinch .
0,1931 uil harte liuf er fur sich .
0,1932 iedoch muos er biten .
0,1933 der alte gab im galaite .
0,1934 ze des grabes inuerte .
0,1935 daz was peter der guote hirte .
0,1936 In dem grabe si funden .
0,1937 zewei touch diu waren sundaer gewunden .
0,1938 daz eine umbe sin houbet .
0,1939 daz hat michel getougen .
0,1940 daz ander umbe sinen lichnamen .
0,1941 si huoben iz uz dem grabe .
0,1942 den liuten si iz zeigten .
0,1943 iesa si z gelovbeten .
0,1944 Welich wunder mach des iemen haben .
0,1945 daz er restunt uon dem grabe
0,1946 der lazaro daz leben gap .
0,1947 der dri tage toter in dem grabe lach .
0,1948 unde da die einlef herren .
0,1949 in dem beslozen huse waren .
0,1950 wie sin lichnam here .
0,1951 in daz hus chome .
0,1952 ane uenster unde ane ture .
0,1953 da stechet ein rigel uore .
0,1954 do sprach unser herre .
0,1955 daz in fride ware .
0,1956 Sin stimme was uil heilchlich .
0,1957 uil harte erchomen si sich .

0,1958 si wanten ze ware .
0,1959 daz iz ein geist waere .
0,1960 des antwurte der guote .
0,1961 ir gedanch unde ir muote .
0,1962 ia ne hat der geist .
0,1963 weder pein noch fleisk .
0,1964 tuot uf iuwereu ovgen iuweren sin .
0,1965 unde sehet daz ich iz pin .
0,1966 do ne zwiueloten si niht .
0,1967 thomas was da niht .
0,1968 Unser lieber herre .
0,1969 der rescein in dar nach sciere .
0,1970 er sprah e si sith wessen .
0,1971 daz man sprichet an der misse .
0,1972 “pax uob’ .”
0,1973 als iz gescriben ist .
0,1974 duo sprach unser herre .
0,1975 zu dem zwiuelare .
0,1976 “nu gench her naher zu mir .
0,1977 ein urchunde gib ich dir .
0,1978 nu nim dinen uinger .
0,1979 unde lege in in mine wunden .
0,1980 unde sih iz mit den ougen .
0,1981 so maht u iz gelouben;”
0,1982 Do anwurhte ime thomas .
0,1983 wand er geuestenot was .
0,1984 ich geloube iz durch not .
0,1985 du bist mine herre unde min got .
0,1986 do sprach unser trahtin .
0,1987 do manet er die ellenden chint sin .
0,1988 “uil salich pist u thomas .
0,1989 wande du mich gesehen hast .
0,1990 ave di sint uil salich
0,1991 die mich geloubent unde mich nine gesehen;”
0,1992 Do chomen si alle sament .
0,1993 ze galilee in daz lant .
0,1994 uf einen berch uil hohen .
0,1995 da betten si an unseren herren .
0,1996 unde sin heiligi muoter .
0,1997 du erscein in der guote .
0,1998 er zeicte in sine wunden .
0,1999 in fuoze unde in handen .
0,2000 er sprach “mir ist geben widere .
0,2001 der gewalt hie in erde unde in himele .
0,2002 einen geheiz tuon ich iu .
0,2003 daz ich wil wonen mitsamt iu .
0,2004 die zit der werlt lebes .
0,2005 uil gewis sult ir wesen des;”

0,2006 Do er du enden wolde .
0,2007 du tet er also er solte .
0,2008 ze muose gie der gote sun .
0,2009 mit sinen lieben iungeren .
0,2010 do rafste er die herren .
0,2011 daz si ungeloubich waren .
0,2012 er sprach ir sult mit gewalte .
0,2013 uaren in dem lante .
0,2014 toffen unde bredegen .
0,2015 beidu den uater unde den sun .
0,2016 unde den heiligen geist .
0,2017 der geleret iuch allermeist .
0,2018 wie ir sult eruullen .
0,2019 mines uater willen .
0,2020 zehen tage bitet min .
0,2021 unze sult ir insamet sin .
0,2022 so sent ich iu ze ware .
0,2023 einen anderen trostaere;
0,2024 Do was sin muoter Maria .
0,2025 unde endereu sineu hiwen .
0,2026 er sprach “ich ne laze iuch niht weisen .
0,2027 in dirre ellenden freisen .
0,2028 ich chuome widere zu iu .
0,2029 minen trostgeist gibe ieh iu;”
0,2030 Do scied er uon den herren .
0,2031 uil trurich si waren .
0,2032 mit amere sahen si ime nach .
0,2033 ein engel in zu sprach .
0,2034 der uon iu geuaren ist .
0,2035 der chuomet her widere daz ist crist .
0,2036 ein gewaltiger urtailare .
0,2037 daz wizet wol ze ware .
0,2038 Vns saget ysaias .
0,2039 weleh der antuanch was .
0,2040 do unser lieber herre .
0,2041 fuor in siner lere .
0,2042 uon disseme ellende .
0,2043 ze den himelischen landen .
0,2044 die engel da waren .
0,2045 in sinem dienest si fuoren .
0,2046 neheiner helfe was ime durft niht .
0,2047 unser herre da uon uns sciet .
0,2048 do enphiengen in die lufte .
0,2049 er fuor in siner gotlichen crefte .
0,2050 ze himele also scone .
0,2051 daz gescah in einer none .
0,2052 IN den himelischen choren .
0,2053 da wunderoten sich die engelischen herren .

0,2054 wer der waere .
0,2055 der uon edome chome .
0,2056 “sin lip ist zebrochen .
0,2057 sin gewate durchstochen .
0,2058 besprenget mit pluote .
0,2059 des wunderote unsich note .”
0,2060 Des antwurte in dare .
0,2061 crist unser herre .
0,2062 “nu uernemen algemeine .
0,2063 ein torkelen trat ich eine .
0,2064 ich han mit minem gewalte .
0,2065 den mennicken gehalten .
0,2066 uone hellichliche sere .
0,2067 ich sag iu ouch mere .
0,2068 ich han in miner guote .
0,2069 iuch geuestenote .
0,2070 wider dem tiuelichen ualle .
0,2071 ich bildote iuch alle .
0,2072 in miner magencrefte .
0,2073 ze dirre hersceft
0,2074 Ich ne chume iu niht eine .
0,2075 ich pringe iu ein mandunge diu ist gemeine .
0,2076 mit iu suln puowen miniu chint .
0,2077 diu noch in ellende sint .
0,2078 si niezent algeliche .
0,2079 mit iu diu himelriche .”
0,2080 Wir lesen uon der ascensione .
0,2081 daz si waere frolich unde scone .
0,2082 mit rehte was si frolich .
0,2083 du der chunich himelisk .
0,2084 den sinen ferechuiant .
0,2085 mit sigenunfte uberwant .
0,2086 der im sin lant hete berovbet .
0,2087 sin lant uil lange getuobet .
0,2088 unze er selbe her chom .
0,2089 unde ime den ruop an gewan .
0,2090 ne muos er du wole frolichen uaren .
0,2091 in sin riche mit dem selben lichnamen .
0,2092 den er uon der magde .
0,2093 enphangen hete .
0,2094 den er so hete behute .
0,2095 daz niemer mere menniske ne tuot .
0,2096 uber al unde uber al .
0,2097 daz in nie niht bewal .
0,2098 ne muos er in du mit eren .
0,2099 in sin riche fuoren;
0,2100 Rehte tet diu gotheit .
0,2101 do er die arbeit . erlait

0,2102 daz er in an die stat fuorte .
0,2103 die nie menniske ne geruorte .
0,2104 dar umbe sol wip unde man .
0,2105 unde swer iht uernemen chan .
0,2106 mit muote ioh mit munde .
0,2107 daz gotes lop chunden .
0,2108 daz der heilige crist .
0,2109 under sinen engelen ist .
0,2110 in dem hohisten himele .
0,2111 in eines mennicken bilede;
0,2112 Do die einlef herren .
0,2113 gewartoten unserme herren .
0,2114 unze in die obristen chore .
0,2115 do musen si horen .
0,2116 in die burch si cherten .
0,2117 uil luzel si lerten .
0,2118 unz er si in siner gnade .
0,2119 den heiligen geist liez enphahen .
0,2120 uil luzel was ir slaf unde ir maz .
0,2121 uil harte temporoten si daz;
0,2122 Die trurigen herren .
0,2123 in einem beslozen huse si waren .
0,2124 durch der iuden forhte .
0,2125 die e daz mein worhten .
0,2126 duo sazen die guoten .
0,2127 si huoben ir gemuote .
0,2128 mit amer unde mit sere .
0,2129 nach unserme herren .
0,2130 alle ir sinne .
0,2131 waren gecheret in sine minne .
0,2132 swigente si sahen .
0,2133 uil tiefe si daheten .
0,2134 waz ir herre der guote .
0,2135 mit in geredet hete;
0,2136 In dem zehenten tage .
0,2137 do er uon in was geuaren .
0,2138 do saz daz ingesinde .
0,2139 zwainzech unde zehenzech manne unde wibe .
0,2140 in dem beslozen hus .
0,2141 ir ne chom neheinez dar uz .
0,2142 des tages . an der triten wile .
0,2143 do trost er di sine\&l
0,2144 antiquis in temporibus .
0,2145 do chom in der sp-c sc-s\&l
0,2146 mit fiurinen zungen .
0,2147 die boten er enzunte .
0,2148 mit der inneren hize .
0,2149 er brahte in forhete iouch gute gewizzen .

0,2150 sterche rat unde uernunst .
0,2151 uil creftich was diu anedunst .
0,2152 duo got mit sinem wistuome .
0,2153 sinen ellenden wolt lonen .
0,2154 uil harte erchomen si sich .
0,2155 iz was plikche un- tonere gelich
0,2156 Do si die gebe enphiengen .
0,2157 uil drate si uz giengen .
0,2158 in die burch si cherten .
0,2159 uil rehte si lerten .
0,2160 si begunden iesa bridegen .
0,2161 beidiu den uater unde den sun .
0,2162 unde den heiligen geist .
0,2163 der geleret unsich allermeist .
0,2164 du iz die liute gesahen .
0,2165 si ilten dar gahen .
0,2166 si wanten z ware .
0,2167 daz si trunchen waeren .
0,2168 uon dem niuwen wine .
0,2169 got hete gefrout di sine .
0,2170 do giengh is in not .
0,2171 si waren alle uerwandelot .
0,2172 uon den niuwen tranche .
0,2173 daz in got selbe sancte .
0,2174 Choson si begunden .
0,2175 mit allen zungen .
0,2176 den tach si lerten .
0,2177 swa si hine cherten .
0,2178 an dem anderen tage .
0,2179 also ich uernomen habe .
0,2180 du becherten si an der stunt .
0,2181 mere denne driu tuosent .
0,2182 manne unde wibe .
0,2183 got hete gesterchet die sine;
0,2184 Iudas der trugenare .
0,2185 sin stul stunt lare .
0,2186 uon den heiligen geiste daz bechom .
0,2187 daz si uunden einen man .
0,2188 die selben huskenosce .
0,2189 die namen in mit loze .
0,2190 sin name der hiez mathias .
0,2191 uone gote er dare erwelt was\&1
0,2192 Diu zale was eruullet .
0,2193 sc-e peter daz gebot
0,2194 daz si solten . ilen
0,2195 tihten unt scriben .
0,2196 die cristenheit leren .
0,2197 de uita unseres herren .

0,2198 so si in diu ende .
0,2199 wurden gesendet .
0,2200 daz si solten bredegen .
0,2201 daz heilige euwangelium;
0,2202 Do berieten si sich sciere .
0,2203 du erwelten si uiere .
0,2204 daz eine was Lvcas .
0,2205 daz ander Marcus .
0,2206 daz tritte matheus .
0,2207 daz uirde Johannes .
0,2208 Matheus buplicanus .
0,2209 der dihtote alsus .
0,2210 der guote hirte .
0,2211 uone gotes geburte .
0,2212 er zalt uns vil rehte .
0,2213 cristes geslahte .
0,2214 uon aneenge unze iungest .
0,2215 er screip liber generationis .
0,2216 Marcus der guote .
0,2217 den nam petrus in sine huote .
0,2218 uon der toufe er uns sagete .
0,2219 uil luzel er uerdagete .
0,2220 uon unserem herren .
0,2221 swaz traf ze sinen eren .
0,2222 der wart sit gesehen .
0,2223 under den uieren uehen .
0,2224 der selbe scribare .
0,2225 daz er ein leu ware .
0,2226 der uns gesagen chunde .
0,2227 uon gotes urstende;
0,2228 Dar nach scribet lucas .
0,2229 uone chintheite der maget was .
0,2230 er uingh an z ware .
0,2231 uon dem tuofare .
0,2232 er wart sit gesehen .
0,2233 under den uier uehen .
0,2234 daz er ein rint ware .
0,2235 der uns sagete uon dem sere .
0,2236 wie der waltende got .
0,2237 an der werlt wart gemarterot .
0,2238 Johannes apls .
0,2239 der begund es alsus .
0,2240 uon dem aneenge unze an daz trume .
0,2241 er screip "in principio erat verbum ."
0,2242 er wart ouch gesehen
0,2243 under den uier uehen .
0,2244 daz er ein are waere .
0,2245 der ze oberiste fuore .

0,2246 mit zwain sinen uederen .
0,2247 flovch er ze den himelen .
0,2248 da sach er menegeu wunter .
0,2249 diu screip er besunter .
0,2250 des muget ir sin uil gewis .
0,2251 er screip ein buoch de ist apocalypsis;
0,2252 Si taten iz durch not .
0,2253 si wurden iesa gesunderot .
0,2254 man sante si in diu ende .
0,2255 die heiden bredegende .
0,2256 allenthalben in diu lant .
0,2257 in gebot daz der heilant .
0,2258 daz si alle die enphiengen .
0,2259 di an die riwe giengen
0,2260 Do stunt iz unlange .
0,2261 peter uuor dannen .
0,2262 in ein burch diu hiez antyoch\&l
0,2263 da wart er inne ein biscof .
0,2264 uil wol er da leret .
0,2265 uil manege er da becherte .
0,2266 sit wart er dar in rome .
0,2267 ein gewaltiger patrone .
0,2268 Nu sculen wir beuinden .
0,2269 in dirre heiligen gotes minne .
0,2270 wi sich der geist uon der hohe .
0,2271 misket in unser brode .
0,2272 wie er her nider zu uns gat .
0,2273 alse diu gescephede gestat .
0,2274 an dem libe unde an der sele .
0,2275 daz wellen wir iuch leren .
0,2276 nu tuot uf diu inneren oren .
0,2277 diu uzeren sulen iz horen
0,2278 Vnser fleiskich erde .
0,2279 diu sol getemperot werden .
0,2280 mit dem geiste der forhte .
0,2281 also er uns uor worhte .
0,2282 wil er unsich iteniuwen .
0,2283 so leitet er unsich ze der heiligen riuwe .
0,2284 diu sol uns leren .
0,2285 wi wir got sulen phlegen .
0,2286 dannen chomet uns dieumuot .
0,2287 unde gedigenlichez muot .
0,2288 wol swigente haben wir den armen geist .
0,2289 alse du herre wol weist .
0,2290 den du unsich lertest .
0,2291 du duo uf den berch mit dinen iungeren chertest .
0,2292 Ein gebe uil tuoire .
0,2293 diu misket sich zuo unserem fuore .

0,2294 daz ist geist der guote .
0,2295 der zuntet unser gemuote .
0,2296 daz iz uf zuo gote get .
0,2297 also daz fiur in siner nature gestet .
0,2298 daz pringet uns frovde unde gedingen .
0,2299 daz wir den nahisten minne .
0,2300 dannen loben wir got .
0,2301 gescihet uns liep oder not .
0,2302 so haben wir ebendolunge .
0,2303 dar nach chum ein hellunge .
0,2304 so sin wir ze ware .
0,2305 reht miteware .
0,2306 So chum uns daz gewizede .
0,2307 daz temperote unser nezzene .
0,2308 swa si uon gote geflozen ist .
0,2309 uil wol gerainet si crist .
0,2310 sciencia heizet du tugende .
0,2311 diu uns uon der gebe chumet .
0,2312 diu leret uns denne .
0,2313 daz wir uns rehte bechennen .
0,2314 dannen chumet uns paciencia .
0,2315 den uienden uergebe wir iesa .
0,2316 uon der rawe chumet uns ein nezene .
0,2317 diu ist michel bezzer .
0,2318 daz wir mit den trahenen suoze .
0,2319 wasken gotes fuoze .
0,2320 mit der saligen MaRiEN .
0,2321 des ne scule wir niemer gezwieuelen .
0,2322 So chumet uns fortitudo .
0,2323 dem lufte uuoget er sich zuo .
0,2324 swer sich uf wider gote heuet .
0,2325 we uaste er in denne wider nider sleht .
0,2326 er leret uns in allen gahen .
0,2327 daz wir alle die werlt uersmahen .
0,2328 dannen chumet uns chuske .
0,2329 gesterchunge maiste .
0,2330 an dem muote unde an dem libe .
0,2331 diu heizet rehte underscide .
0,2332 diu leret uns geren .
0,2333 des uns got gerne wil geweren .
0,2334 des ewigen lebennes .
0,2335 uil hungerich werden wir des;
0,2336 Dar nach chumet uns der rat .
0,2337 der ist uil salich der in hat .
0,2338 der leret uns gehorsamen .
0,2339 so wir sin willechlichen arm .
0,2340 uon dannen chumet uns gedinge .
0,2341 ze den himeliskn dingen .

0,2342 so chumet uns humilitas .
0,2343 die bringet uns benignitas .
0,2344 so scol diu erbarmede uon uns gan .
0,2345 uber einen iegelichen man;
0,2346 Dise tugende bringet uns der rat .
0,2347 unser gehucht der gebe chunde hat .
0,2348 durch die himele er si fuoret .
0,2349 so si nah gote cheret .
0,2350 so suln in die suochen .
0,2351 uon swem er sin ruochet .
0,2352 in den himelischen choren .
0,2353 der rat der sol si fuoren .
0,2354 si senent sich nach sinem gewalte .
0,2355 so ist diu gebe behalten;
0,2356 Do gesamenent sich danne .
0,2357 zwa getriwe genannen .
0,2358 daz ist sp-s intellectus .
0,2359 daz unser heizet uernunst .
0,2360 wie wol si sich fuogent .
0,2361 ob si diu werlt niene truobet .
0,2362 unser wille si fuoret .
0,2363 da si der wistuom ruret .
0,2364 swer des gesmeket .
0,2365 diu suze ist unerechet .
0,2366 unser wille . uns daz eruert .
0,2367 ob im ez diu sunde nine wert .
0,2368 daz er geuahet den list .
0,2369 waz diu oberiste guote ist .
0,2370 uil suze si sich underminnent .
0,2371 daz chumet uon lietheme sinne .
0,2372 so hat uns diu hucht behalten .
0,2373 ein teil uon sinem gewalte .
0,2374 da muzen wir horen .
0,2375 da ne mach niemen den anderen uerrer geleren .
0,2376 swer so nach gote chumet .
0,2377 der hat sich dar gefruomet .
0,2378 chumet er anderes dare .
0,2379 so ne tuot iz niemen deheinen ware .
0,2380 So bringet uns diu uernunst zuo .
0,2381 daz heizet meditacio .
0,2382 diu leret denne .
0,2383 daz wir got erchenne .
0,2384 so beginnen wir in minnen .
0,2385 mit liehteme sinne .
0,2386 so haben wir daz lutere gewizede .
0,2387 daz ist daz reine herze .
0,2388 So chumet sapientia .
0,2389 die bringet temperantia .

0,2390 so si wir iusticia .
0,2391 heilich werden wir sa .
0,2392 so haben wir mandunge .
0,2393 die ne mach gezellen dehein zunge .
0,2394 diu git uns longanimitas .
0,2395 so richeset an uns pax .
0,2396 so haben wir fride gewonnen .
0,2397 so sin wir der forhte entrunnen .
0,2398 So sten wir uil hohe .
0,2399 so megen wir got phlegen .
0,2400 ob diu erste tugent .
0,2401 uon unserem herzen niene chumet .
0,2402 daz ist sp-s timoris .
0,2403 des megen wir sin gewis .
0,2404 sweme si entwichet
0,2405 der tivvel in beslichet
0,2406 daz wirt der hohiste val .
0,2407 in daz tieffiste tal .
0,2408 also geualte diu hochuart .
0,2409 den engel daz er wart . ein hellewarte .
0,2410 er warf den mennicken z ware .
0,2411 sehstehalp tusent iare .
0,2412 uon dem oberisten liechte .
0,2413 er brahte in ze nihte .
0,2414 unze uns got getroste .
0,2415 uon der uinstere er unsich loste .
0,2416 in uoller siner gnaden .
0,2417 nu sprechen wir: “amen .”